

B. N. II. 176.
h. 49,8.

X 1877574

DISSERTATIO JURIS FEUDALIS,
DE

II k
3118

ADOMA,

Heer.-Steuer./Reise.-Geld/
Fahrtlösung/

Qvam

DIVINA FAVENTE GRATIA,
PRÆSIDE
VIRO

Magnifico, Prænobilissimo, Consultissimo atq; Excellentissimo

DN. HENRICO COCCEJO,
JCTO FAMIGERATISSIMO,

Serenissimi ac Potentiss. Electoris Brandenb. Confiliario,
Facultatis Juridicæ Ordinario, & Professore Primario,

Antea Summi Regiminis Electoralis Palatini Confiliario, &
Supremi Collegii Revisorii Assessore, in Alma Heidelb. Decretal.
Pandectar. & Juris Gentium Prof. P. Ordinario meritissimo,


IN AUDITORIO JCTORUM
Ad d. Martii, A. MDCXCII.

Placido Eruditorum Examini submitte

PHILIPP. ERNEST. DE BECKER,
Mindâ Westphalus, A. & R.

Francofurti ad Viadrum,
Literis JOHANNIS COEPSELII, Acad. Typogr.







PRÆFATIO.



Uit illa semper Longobardorum,
Germaniæ Gentis (quippe quam
suis jam temporibus inter Sve-
vorum Gentes recenset Tacitus
de Mor. Germ. c. 40.) generosa
ac magnanima indoles, ut non
tantum hostes suos armis forti-
ter aggrederentur, feliciterque profigarent, sed et-
iam subactis iis leges sanctissimas & ad rempubli-
cam suam bene gubernandam saluberrimas conde-
rent & promulgarent. Bellorum & Victoriarum ejus-
dem gentis satis præclara exstant monumenta apud
Kipping. Histor. univers. L. 8. c. 3. passim & alios. Legum
verò quantam illi curam habuerint, præter insignia
illa specimina, quæ Lindenbrogius cum aliis legibus

A 2

anti-

PRÆFATIO.

antiquis edidit, ostendit quoque vetustissimum illud volumen juris feudalis, quod per totam Germaniam & ferè Europam usu est receptum. Licet autem, quæ ista tempora obsederat verborum barbaries, in has optimas quoque materias effusa fuerit; plurima tamen ingeniosè inventa, accuratè elaborata, prudenterq; statuta sunt; quin inventa ratio est ipsis Romanis incognita, quâ summa quoq; regalesq; potestates, salvâ Imperii Majestate, aliis per modum feudalem communicari possunt. Rerum verò tanta ubertas, ut vix quicquam in materia feudali occurere possit, quin ejus inde decisio peti derivariq; queat. Quid verò rationibus reipublicæ convenientius vide ri potest, quam mutua illa inter dominum & vasallum obligatio; cùm dominus suo beneficio generosas & præclarè meritas familias in perpetuum ad fidelitatem obstrictas teneat, hæ verò eodem & splendorem suum retineant & ad paranda nova decora excentur? Quæ & causa est, cur materia hæc tam diligenter à Doctoribus Jurium Feudalium tractata, totq; vigiliis ab iisdem elaborata fuerit. Cum igitur hujus materia non minima pars sit ea, quæ de Adoba tractat, eam pro disputatione & exercitio Academico pertractandam & paulò accuratiùs examinandam elegimus, quod Deus Ter Optimus Maximus bene & feliciter mibi succedere jubeat.

Cap. I.

•S•C•U•L•I•C•U•S•

Caput I.

De Voce ADOHÆ.

Summaria.

1. Descriptio vocis Adohæ.
2. An differat ab Adjutorio?
3. Quomodo differat ab hostenditius?
4. Respondetur ad 2. F. 40.
5. Quomodo à Superindicto.
6. Definitio Adohæ.

§. I.

Nox ADOHÆ, qvam barbaram & latinis inusitatam esse cuivis obvium est, originem suam à Siculis potissimum Doctoribus traxit, & ab aliis ADOHAMENTUM, ab aliis Redemptio hostenditiarū appellatur, diciq; potest Germ. Heersteuer/ Reisegeld/Fahrtlösung/Lehndienste-Tax. Andr.de Isern. c.un. §. Si mulier. vers. in regno de Capit. Corrad. Descēdere eam putant à verbo ADUNARE, qvōd scilicet plures Vasalli, fortè non integrum feudum tenentes, se adunent & contribuant tantum, qvantum ad unum militum sistendum sufficit: Andr. de Isern. in c. un. §. ille tamen vers. erat in curia de Contr. feud. apud par. term. Id c. un. §. Si mulier lit. S. de Capit. Corrad. Alii ab ADÆRARE hoc nomen derivant, diciq;ve ita existimant, qvod tantum æris contribuant Vasalli, qvantum ad sistendum instruendumq;ve militem sufficit.

§. II.

Hæc Adoha differt ab adjutorio, qvod vocant, ut species à suo genere; nam hoc non tantum ADOHAM, qvæ & ipsa adjutorium qvoddam est, z. Feud. 40. vers. similiter. sed omnia auxilia, sive ex lege fœderis,

sive ultro & amicitiae gratia, sive quacunqve alia ex causa mittuntur, comprehendit, Matth. de Afflict. §. similiter n. 15. de Capit. Corrad. ADOHA autem est illa pars fructuum feudi, quam solvunt Vasalli loco servitorum. Ayell. de Jur. Adob. n. 53. vid. infr. §. 6.

§. III.

Differt quoque ab HOSTENDITIIS, utpote quae propriè sunt ipsa servitia militaria, quae præstare tenentur vasalli Principi in hostem eunti. Plerique verò HOSTENDITIAS idem quod Adoham esse existimant, Gudel. de Jur. Feud. p. 4. c. 6. n. 4. Bitsch. Comm. feud. lib. 2. tit. 40. Not. 5. Struv. Syntagma. Jur. Feud. cap. II. apb. 5. n. 4. qui vocem hostenditarum pro ipso pretio servitorum capiunt, per d. text. in 2. F. 40. vers. simius. Neque negamus, hostenditas aliquando accipi pro earum aestimatione; uti voce operarum continetur pecunia pro operis debita. l. 6. ff. de Oper. lib. in primis cum de earum actione seu petitione agitur, l. 4. ff. eod. in actione enim sunt operæ & servitia ipsa, etsi aestimatio aliquando in præstatione sit. At in proprio & genuino sensu hostenditas ipsa servitia esse, vel ex origine earum patet. Non enim ab hoste id est inimico dicitur, ut putant. Gudel. d. p. 4. c. 6. n. 4. aliquique Sed ab hoste seu Hoste/ quod expeditionem, castra, vel exercitum veteri sermone Teutonico significat, quemadmodum freqvens hic sensus est in antiquis Germaniæ legibus, Wisigothicis, Salicis, Ripuariis, Saxonics, Longobardicis; item in Capitularibus Caroli M. passim; quae loca collegit Lindenbrog. in Glossar. voce Hostis, unde Gallicum, Host, quod exercitum notat, quem & Itali Hoste, & Hispani LA HUESTE, & Angli

Angli AN HOSTE dicunt. Atque hic sensus clarissimè apparet ex 2. F. 40. ubi dicitur quod vasalli, qui non eunt cum rege in expeditionem, debeant dimidium fructuum ejus anni solvere, QVO HOSTEM FACIUNT, id est Expeditionē: idemq; habetur in 1. F. 7. Sed & freqvens apud veteres formula est: IN HOSTEM PERGERE d. c. 40. IN HOSTE HOMICIDIUM FACERE, &c. Hinc verissimè Hostenditiæ, quasi Ostendienste/ expeditio seu militaria servitia uti Frondienste/ Herrendienste/&c. dicuntur. Freher. ad Constit. Carol. III. ad voc. pro stipendio. Qvicquid dissentiant Knichen. de Subl. terr. jur. c. 3. n. 385. & Gothofr. Anton. disp. feud. 7. 1b. 6. c.

§. IV.

Nec movet textus in d. c. 40. vers. Similiter: ubi ex saniore lectione definiuntur hostenditiæ id, quod præstant, qui cum domino in hostem non eunt; Non enim ibi definiuntur hostenditiæ in genere, sed tantum explicatur, quid Conradus Imp. in Constitutione sua, qua certam quantitatem hostenditarum definit, ea voce intellexerit; scilicet in illo loco dici hostenditas illud adjutorium, quod vasalli in pecunia præstant; quia de eo definiendo agebatur: uti de operarum æstimatione modo dictum est.

§. V.

Aliud quoque ac Adoha est HERIBANNUM, Heerbann/ id est, citatio ad DELECTUM, der Aufboth. Accipitur tamen etiam pro poena non comparentis; quam HERISCHULDAM, Heerschuld dici ait Cujac. ad §. 1. Feud. in Prefat. alias Herischlitz. Vox vero Heerschild/ longè aliud, & scil. insignia dignitatum feudalium significat, quorum septem recensentur in Spec. Suev. Lib. I. cap von den

den Heerschilten. 7. Sed & differentiam porro statuūt peregrini Dd. inter Adohām & *superindictum*, qvod iis est qvædam sublevatio, qvæ contingit in casu, si castrū aliquod foculariis (ut vocant) quibusdam destituatur, & hinc reddatur incapax ad solvendam integrum portionem Adohæ, qvippe tunc castrum hoc ab eo onere pro parte sublevatur, & pars illa castris vicinis imponitur. Matth. de Afflict. l. 2. rubr. 10. n. 28. quis dicatur *Dux*. Sed id parūm ex usu nostro.

§. VI.

His in antecessum remotis, facilis est definitio *ADOHÆ*, qvæ est portio fructuum feudi seu eorum æstimatio, qvæ loco servitorum feudalium domino feudi præstanta est. Ayell. d. l. n 53. Jacob. de Franc. *de Feud.* n. 11. & n. 19. Dixi; Loco SERVITORUM FEUDALIŪ ne confundatur cum RELEVIO, qvippe quo etiam portio fructuum vel eorum æstimatio aut pecunia præstatur, sed id non persolvitur loco servitorum feudalium, verūm pro renovatione investituræ; nec præstatur, nisi mortuo demum vasallo ab ejus herede. Ayell. d. l. num. 70.

Caput II. De Quantitate Adohæ.

Summaria.

1. 2. 3. 4. *Varia Adohæ Quantitas.* 5. *Novissimè constitutus est semis fructuum unius anni.* 6. *An perpetuò, an quando ille semis oblineat?* 7. *Cujus anni fructus intelligantur?* 8. *Accurata proportio & computatio Adohæ ex Jure Communī ad legitimum usurarum modum, ubi exponitur l. 3. §. fin. ad L. Falciā, &c.* 9. *Probatur porrò ea computatio ex legibus imperiis:*

5

Et removentur dubia; ac singularia quædam notantur. 10. Computatio vulgatior, sed incertior. 11. In Saxonia & Marchia quæ obtineat servitorum computatio; Et an per eam sublatæ sit estimatio juris Communis? 12. Separantur tres distinctæ in hac re quæstiones. 13. An dominus augere Adobam aut minuere possit? 14. An diminuatur Adoba propter vitam & militiam feudo annexa; ubi de expeditione Romana & contributione ad bellum Turcicum.

§. I.

Nihil æqvè varium fuit ac Adohæ determinatio cùm locis tum temporibus. Qvàm accurate in regno Siciliæ & Neapolitano non modò ipsius Adohæ quantitas pro modo terrarum earumqve reddituum, sed & portio illa, qvam conficiendæ huic quantitati vasalli pro numero larium, seu, ut vocant, foculariorum, aut, ut alii adhuc insolentiùs, focagiorum, item civitates contribuunt, pleniùs describit Regiæ Cameræ Neapolitanæ olim Præses Jacobus de Ayello, *Traçl. de Adoba n. 52.* Sed parùm ad usum nostrum. Id eqvidem indubium est, si in literis investituræ, vel in concessione feudi certa quantitas expressa, eam servandam esse; Idemqve est si consuetudo quantitatatem determinaverit, qvæ vim conventionis habet, *l. 35. ff. de Legib.*

§. II.

At id dubium est, si neqve lege feudi, neq; consuetudine loci certa quantitas Adohæ definita est, qvaliter æstimanda illa sit? Et qvidem constitutione Caroli III., ut creditur, alternativè totius anni fructus, vel aliquva portio monetæ in singulos mansos in Adoham præstanta erat: Ita enim decernit: *Isti vero tales*

B

rema-

remanere cupientes, si apud Dominos impetrare valeant, quod mansos possideant -- monetae, vel totum fructum feudi in illo anno pro stipendio persolvant: Gold. tom. I. Constit. ad ann. 881. Freher. in Comment. ad d. Constit. Quantitatem monetae oblitteravit vetustas, eamque lacunam supple-re variè satagunt, sed nullâ certâ ratione: decimum utiq; pondus intelligi hîc non posse constat, cùm non possint comparari totius anni reditus & decima ejus portio ut eorundem servitiorum premium.

§. III.

At Conrado (ut vulgò legitur, et si Hotom. Lo-thario, Cujacius Friderico I. ea capita tribuant) gravissimū visum fuit, vasallū toto anno alimentis & fructibus privari, eoq; pro totius anni fructibus tertiam eorum partem substituit in Alemannia; in Lombardia autem 12. denarios in singulos modios imposuit: 2. F. 40. pr. Qvæ tamen differentia tantum ad expeditiō-nem Romanam pertinet, cuius onus Germanis multo gravius est, ob Alpium itinerisq; difficultatem, qvām Lombardis seu Italies, atq; ideo pluris à Conrado aestimatur.

§. IV.

Sed nec ea definitio obtinuit aut saltem diuturna fuit; Vetustus enim Auctor Tract. de Benef. §. 13. decima parte fructuum iter redimi solere refert: Ibunt, inqviens, illuc & alii omnes imperialia beneficia habentes, quisque cum Domino suo, nisi talento decimo iter redimat, quod annuatim à Domino suo babuerat. ap. Freher. ad d. Constit. verb. monetae. Qvod iisdem verbis constitutum quoque est in Spec. Svev. I. 2. c. 8. §. 7. Und wollen sie blyben / so müssen sie sich do von kauffen / mit dem ze-henden

henden Pfund / was das Gut ein Jahr gilt / &c. Idem habetur in Jure feud. Saxon. cap. 6. §. 1. ibi: Oder muß die Fahrt lösen mit dem zehnenden Pfund. &c.

§. V.

Denique constitutione Friderici I. Imp. quæ habetur in 2. F. 55. §. firmiter. & apud Radev. *de Gest. Frid. I.* lib. 2. c. 7. decisum est; *ut promiscue tum in Lombardia tum in Alemannia Vasalli, qui Dominum non comitantur, dividiam partem fructuum unius anni Adobæ nomine persolvant*, sublata distinctione locorum, cùm possit vasallus ipsum servitum præstando evitare constitutionem. *arg. l. i. §. fin. Ne vis fiat ei.* Et hunc ferè semissem fructuum observari in regno Siciliæ patet ex Ayell. *d. l.* At verò idem Fridericus I. in proximè præcedente constitutione, 2. F. 54. sanciverat, *ut is, qui dominum non comitatur, præstet stipendia militiae pro quantitate feudi.* Quæ definitio ab altera longè recedit, tum quia non semper stipendia militiae semissem fructuum æqvant, tum, quia ex priore constitutione semper eadem est quantitas Adobæ, sc. semis fructuum unius anni, ex altera autem maximè variat; cùm alia militia aliâ sumtuosior, longior, seu difficilior sit.

§. VI.

Hinc igitur omnino statuendum videtur, semissem fructuum non esse certam & perpetuam Adobæ æstimationem; Sed, si dominus servitum militare, sibi præstari velit, non satisfacere vasallum, nisi integræ militiae stipendia persolvat; Certi enim juris est, eum, qui rem debitam non præstat, minimum veram ejus æstimationem, sæpè etiam amplius & omne

B 2

id

id, qvod interest, nunquam autem minus solvere debere. *I. g. l. 5. § fin. ff. de In lit. jur. arg. l. ult. C. de Fid. lib. l. pen. ff. de Cond. Trit.* Semis itaq; fructuum non ideo statutus est, ut dominus debit is servitiis fraudaretur, si majora stipendia docere possit; sed in subsidium, cùm stipendi quantitas fortè non constat, nec ostendi possit, ne dominus oneraretur necessitate probandi quantitatem stipendiorum, & qvod suâ interest servitium ipsum præstari; ut in dubio pretium servitii determinaret.

§. VII.

His igitur casibus, qvibus semis fructuum præstatur, qværi solet, cuius anni fructus intelligatur? Alii enim intelligunt semissem ejus anni, qvo in hostem ducitur; *Marth. de Afflict. §. nt autem æquitas. n. 10. de Pac. jur. firm.* per *Const. Carol. III. §. 2.* & per *2. F. 40. verb. Illius anni qvo hostem faciunt.* Verum cùm redditus annorum valdè varient, nimis inæqualis foret ea æstimatio; qvin, si fortè eo anno labes, vel vis hostium &c. omnem fructum tulisset, nihil deberet vasallus. Rectius igitur *Dd. comm. semissem fructuum unius anni in genere intelligunt;* per *2. F. 55. §. firmiter.* veluti in textibus, qvibus decima pars definitur, annus in genere nominatur, non ille qvo expeditio fit. *supr. Tb. 4.* Nec obstant textus oppositi; tum qvia illi mutati sunt per *Text. in 2. F. 55. §. firmiter.* tum qvia illius anni redditus is esse intelligitur, qvi ex collecto pluriū annorum redditu &c. in æquales partes diviso ita conficitur, ut mox dicetur.

§. VIII.

Qvomodo ergo definietur anni in genere fructus?

Etus? Id accurata juris ratione fieri potest ad modum legitimarum usurarum. Dicimus igitur, ex lege Imperii computatis 20. annorum fructibus confici verum prædii premium, & hujus ex tot annorum fructibus collecti precii vigesimā partem esse fructum unius anni, cuius semis Adoham constituit. Ratio hæc est: quæ est ratio legitimæ usuræ annuæ ad totam sortem, eadem est annui fructus ad totum premium fundi; quia uti annua pensio æstimat & metitur valorem fortis; ita annuus fructus prædii valorem totius prædii. Ut ergo lege Imperii legitimæ usuræ sunt quincunces; vid. tb. seq. quæ vicesimo anno sortem æqvant, & vicesima pars sortis sunt, atq; adeò collectis viginti annorū usuris vera fors cōstituitur; ita collectis è fundo 20. annorum fructibus verū fundi premium; hujus precii vicesima pars est verus fructus ejus annuus, cuius semis Adohā efficit. Hac ratione utitur JCtus in l. 3. §. fin. ff. ad L. Falc. Species hæc est; legati sunt reip annui fructus prædii Sejani; heres ex hoc legato Falcidiā detrahet: quæritur quodnam sit verum hujus legati anni premium? Respondetur, premium fructuum tot annorum, quot sufficiunt sorti ex usuris legitimis, quæ in hac specie sunt trientes, conficiendæ. Verba d.l.3. §. fin. hæc sunt: Si Reip. in annos singulos legatum sit, cum de lege Falcidia, queratur, Marcellus putat, tantum videri legatum, quantum sufficiat sorti ad usuras trientes ejus summae, quæ legata est, colligendas. Sed cur ad trientes usuras? Resp. Cūm quincunces & trientes in provinciis tūm solitæ essent, l. 7. §. 10. in fin. ff. de Adm. tut. trientes seu leviores potius hic acceptæ sunt, in favorem heredis, & ex præsumpta mente testatoris, qui heredi potius quam Legata.

gatario prospicere videtur, l. 67. § 8. ff. de Legat. 2. ut maiorem quantitatem Falcidiæ nomine detrahere possit: nam si V. G. 20. annua legata sint, computatis usuris trientibus sors erit 500, & heres detrahet nomine Falcidiæ 125: computatis quincuncibus, sors erit 400, & heres detrahet tantum 100. Favore igitur heredis trientes computantur in d. l. 3. §. fin. Idemque contingit, et si legatum annum piae causæ relictum aestimetur. Nov. 131. cap. 12. ibi: vendere, si voluerint, bujusmodi legatum, & non minus pro precio percipere, quam ex tali legato intra 25. annos (quo tempore trientes usuræ sortem æquant) colligitur.

§. IX.

Hic favor, & hæc ratio in aliis cum cœset, regulariter aestimatio rerum fit ad modum quincunciū; quæ sunt vicesima pars sortis, & ex 20. annorum collectione sortem vel premium verum rei conficiunt; cuius precii vicesima pars est fructus unius anni, juxta 2. F. 55. §. 1. & ejus dimidium Adoha. Hæc ratio etiam in ecclesiasticis rebus obtinet, & hæc aestimatio rerum subtilis dicitur in Nov. 7. c. 3. §. 1. in fin. in verbis: Aestimari suburbanum subtiliter, & reputari in precio collecto redditus possibles in 20. annis (quo tempore quincunes usuræ sortem faciunt) computati & in redditibus ex hoc computatis agi Empyteus in, &c. Nec obstat, quod semisses, non quicunes, usuræ definitæ sint in L. 26. §. 1. C. de usur. Ibi enim tantum quæritur, quousque stipulari usuras licitum, non quæ intelligi debeat quantitas, si promissæ non sint. Sed nec movet l. 68. in fin. pr. ff. ad L. Falc. Ibi enim non quæritur de vero precio rei, sed quousque intelligendum sit usumfructuum reip. reliquum

Etum durare. Atqve hanc rationem & computacionem Adohæ expressa constitutio qvoqve imperii in æstimandis subsidiis omnium imperii civium ad expeditionem Turcicam probat & seqvitur in *R. I. Spirens.*
1542. §. 54. ibi: So sollen und wollen Sie ihre Anlagen nach ihrem jährlichen Einkommen an Gülden und Zinsen / neben ihren andern Gütern / Baartschafften und Vorraht rechnen/ anschlagen und entrichten / NB also/ daß 1000. gl. jährlichs Einkommens / auf 20000. gl. Hauptguts und Wehrts gerechnet werde; qvæ est computatio precii ad modum quincuncium usurarum, qvippe qvæ in Imperii lege receptæ & constitutæ sunt; *R. I. 1654. §. 174. Ord. Pol. 1577. tit. 17.* & viginti annorum reditu fortem efficiunt. Specialissimum verò est, qvod Ecclesiæ Hierosolymitanæ prædia 50. annorum: *Nov. 120. cap. 9. pr.* contrâ, qvos donator promisit, 15. tantum annorū reditu æstimentur: *I. 35. §. 3. C. de Donat.* illud maximū premium est, favore & ob conditionem ejus Ecclesiæ; hoc minimū favore donatoris.

§. X.

Cum verò hæc computatio non minus operosa, quam accurata, & saepius res fanti non sit, ut tanta cum difficultate exquiratur verum ejus pretium, vulgo trium annorum colligi tantum reditus solent, & tertia pars reditus unius anni intelligi, ad cuius semi-sem vasallus obligetur. Ayell. *d. tr. n. 52. in fin.* Verùm, cum tertio qvoq; anno terræ cessare soleant, atq; adeò biennii tantum fructus reverà tumi computentur, quo tempore casus aliquis extraordinarius facile durare potest; hinc nimis adhuc incerta hæc æstimatio est, & ab ea, qva illius anni fructus veniunt, quo expeditio

tio fit, parum & vix distat. Hinc alibi vulgo novem anni colligi solent, ut nona pars habeatur pro unius anni reditu: alibi 10 vel 12. anni. Köppen. Ques. ill. 44. n. 31. Certius & accuratius vero est jus commune.

§. XI.

An autem in Saxonia & Marchia iste semis frumentum unius anni sublatus, & in aliam estimationem mutatus est? Neg. Equidem in Saxonia onus feudale unius eqvi estimatur 1000. florenis: Schult. in Addit. ad Coler. dec. 82. Gothof. Anton. disput. feud. 7. th. 7. in fin. Knichen de Paet. vestit. p. 2. cap. 5. circa fin. Dn Struv Synagm. Feud. c. XI. apb. 5. n. 12. Wehner. Obs. pract. voc. Ritterdienste/ §. Jure Saxonico: in Marchia vero 1000. Joachimicis seu Imperialibus. Pruckman. Vol. 1. Cons. 50. n. 503. & 504. Kohl. Tract. de Serv. milt. c. 6. n. 61. Frid. Müller. Pract. rer. for. resol. 72. n. 25. 26. Verum hi 1000. aurei vel imperiales non sunt Adoha, seu estimatione unius servitii militaris, quod uno eqvo fit, quippe quod non vallet 1000. Imperiales, nec vasallus, qui servire ipse non potest, pro uno eqvo 1000. Imperiales solvit; sed ea quantitas est estimatione totius sortis, seu oneris praestandi ex feudo unius eqvi in genere; nequidem fit, ut sciatur quantum Vasallus pro quoque servitio solvere debeat; sed quantum vendita terrâ feudali integro & justo ejus pretio decedat, & ab emptore detrahi possit: scil. si terrae justum premium sit 3000. Imperialium, propter hoc onus feudale ei inherens ea non valebit nisi 2000. Ex eo vero statui certo nequit, quantum Vasallus pro uno quoque servitio solvere debeat; non enim ex modo usurarum id definiri potest, ut Vasallus solvat unus anni usuram legitimam, quia servitium hoc non est annua

annua præstatio, sed aliquando sæpius in eodem anno præstatur, aliquando ne semel quidem in pluribus: & cum usuræ legitimæ ex sorte 1000 Imperialium tantum debeantur pro usu annuo illius fortis, eumq; metantur & æstimantur, non possunt eadem æstimare & metiri servitia, qvæ per annos non præstantur, sed prout casus ac necessitas incidit. Accedit qvòd annui servitii eqvestris in Marchia longè alia sit æstimatione, sc. 150 Imperialium, ut refert Köppen. *Illustr. qu. 44. n. 13.* Superest igitur, si alia in specie moribus loci quantitas pro servitio feudali definita non sit, ut juris communis æstimatione servetur, & sc. vel stipendia militiæ solvantur, vel in dictis casibus semis fructuum unius anni, prout in th. 5. id expositum definitumq; fuit.

§. XII.

Ut igitur distinctè res intelligatur, separandæ sunt tres in hac materia qvæstiones, (1.) Qvot eqvis ex quovis feudo serviendum: **Ob das Lehns mit 1. 2. 3. oder mehr Pferden zu vermaßen oder zu verdienen?** Resp. si determinata sunt servitia in investitura, res plana est: si indeterminata, arbitrio boni viri pro modo feudi definienda sunt, imprimis ex consuetudine loci, si de ea constet. Rosenth. *Synops. feud. cap. 8. concl. 22. n. 4. 5.* Qvin aliquando concurrunt plura feuda ad unum eqvum instruendum, & quisque soluit **ein halbes Ritter-Pferd/ ein Drittelpferd** &c. prout definitum. (2.) Qvanti totum hoc onus feudo inhærens sit æstimandū eo vendito? Resp. Computari mille aureos in Saxonia, & tot imperiales in Marchia, in singulos eqvos, qui debentur, & tantum detrahi feudi integro pretio. *ib. n.* (3.) Qvanti æstimetur unum servitium, si ejus loco pecunia seu Adoha solven-

C

da

da sit? Resp. Cùm hoc determinatum singulariter moribus nostris non sit, servandum esse jus comune, & semissim fructuum unius anni, vel stipendia militiae solvenda, esse, juxta *tb. 5.* donec aliud moribus vel statutis loci inductum appareat. Et ea quæstio huc pertinet.

§. XIII.

An autem hæc adohæ quantitas augetur aucto feudo? Aff. etsi feudum industriâ vasalli auctum furerit, est enim hæc quantitas medietas fructuum, uti diximus, quæ proinde augetur, si aucto feudo fructus quoque augmentur. Nec movet, quod hoc fiat per industriam vasalli, eoque ipsi cedere debeat. Ponimus enim augmentum, non quod vasalli personæ, sed quod feudo accedit; uti regulariter incrementa feudi vasallus, non pleno dominio, sed jure feudi obtinet, *z. F. 4. §. pen.* Illud igitur tenet tanquam partem beneficii, pro quo servitia præstare tenetur licet titulo oneroso comparaverit, vel impensas fecerit: has tamen prout alias juris in feudis esse solet, repetit, *z. F. 28. §. pen.* Quid ad domini commodum promovendum semper laborare, & proprietatem colere tenetur vasallus. *Vultej. de Feud. L. I. c. 10. n. 34.* Unde omnino verior quoque est Kohlii *de Serv. feud. p. 4. n. 177.* & seqq sententia, aucto feudo ipsa quoque servitia indistinctè augeri; cùm alias iniquum foret, aliam & majorem Adoham præstari iisdem manentibus servitiis, aestimationemque servitorum majorem exigi, servitorum quantitate non mutata. Accedit, quod servitia naturaliter debeantur, pro quantitate feudi, *z. F. 54. verb. pro quantitate feudi.* Ergo eâ auctâ augebitur obligatio servitorum. Uti & e contrario minuitur Adohæ ac servitorum quantitas,

55

si feudum sine culpa vasalli diminutum fuerit. 2. F. 77.
 Quid enim naturali æquitati magis convenit, qvām
 eum qvi adversâ fortunâ parte comodi spoliat⁹ est, par-
 te quoque oneris sublevari, maxime cùm onus hoc ex
 commodo resultet. Intelligimus verò incrementum
 & decrementum notabile, cùm fidelitas & servitia feu-
 dalia non habeant tam certam æstimationem, ut qvæ-
 libet mutatio qvasi certa mercede mensurari possit.
 Dissent. Dn. Struv. Syntag. Feud. c. 11. apb. 5. n. 7. 8. 9. 10. 11.
 Ayell. d. tr. n. 55.

§. XIV.

Qværitur porrò, si fortè uno eodemqve anno
 evenerit casus, qvo & solvendum relevium in casum
 prædefuncti parentis, & præstandum Adohamentum
 in casum imminentis periculi, an utrumq; onus præ-
 standum à Vasallo? Negat id Ayell. d. tr. n. 77. sed alte-
 rutrū qvod curia ut pingvius elegerit, deberi vult; ne
 dupli onere gravetur vasallus, sed habeat unde vivat.
 Verùm de jure contraria sententia verior est, nisi aliud
 in specie moribus receptum sit: cùm enim distinctissimæ
 præstationes sint Adohæ & relevii, & ex diver-
 sissima causa debeantur, altera pro servitijs, altera pro
 renovatione investituræ, certi juris alterum per alte-
 rum non consumi, nec ideo debitorem ab uno debito
 liberari, qvia & aliud debet. arg. l. 2. pr. ff. de Priv. del. l.
 130. ff. de Reg. Jur. Atqve hinc falsum quoqve est, qvòd,
 si eodem anno pater præmortuus jam solverit Ado-
 ham, illa post mortem patris in relevium à succedente
 filio præstandum computari debeat. Multò minùs
 dominus pro lubitu debitam Adohæ quantitatem au-
 gere potest in præjudicium vasalli; uti hic nihil agere
 C 2 potest

poteſt in præjudicium domini. Matth. de Afflict. L. 3.
rubr. 12. §. ex eadem lege n. 6. de Cap. Corrad. Minuere
verò, qvin remittere hanc qvantitatem in ſui præju-
dicium poſteſt, qvia prodeſſe vasallo poſteſt, non noce-
re: qvemadmodum Adoham regni Siciliæ minuiffe
Papam refert Ayell. d. tract. n. 18. 19.

§. XV.

Sed qværitur, An diminuatur Adoha, ſi Feudo
onera cohærent? Diftingv. inter onera, qvæ cau-
ſam ab ipſa proprietate habent, eiqve cohærent, uti,
ſi collectæ ſuperiori, ſolarium alii debeantur; & ea,
qvæ ex ſola perſona Vasalli debentur, uti portio fru-
ctuum ex feudo provenientium, qvæ ſolvitur fratri-
bus minoribus ad vitam & militiam. Illa precium to-
tius feudi, atqve adeò etiam ſervitia, qvæ pro qvantiti-
tate feudi debentur, & horum itaq; æſtimationem ſeu
Adoham qvoq; minuunt: nam cùm Adoha fit pars fru-
ctuum feudi, non poſſunt illi intelligi, niſi deducto one-
re feudo cohærente. l. 51. pr. Fam erc. l. 38. §. f Her. pet. Hæc
verò minuunt eam Matth. de Afflict. Dec. Neap. 252. Ayell.
d. l. n. 91. qvia ea non feudi, ſed vasalli onera ſunt, & hu-
jus perſonæ, non rei cohærent. Sed alia qvæſtio eſt;
An fratres minores teneantur pro rata fructuum pri-
mogenito contriбуere in Adoham? Qvod videtur,
qvia ſentit pro parte commodum: & porrò Adoha
eſt medietas fructuum, ideoqve ex toto fructu præ-
ſtanda. Matth. de Afflict. L. 3. rub. 32. §. præterea num.
18. de Proh. feud. alien. per Feder, Sed rectius contra-
rium defendit Ayell. d. l. n. 93. Uti enim ſolus pri-
mogenitus eſt Vasallus ac de feudo investitus, ſolus-
qve ſervitia debet, ita & ſolus Adoham. Cæterūm
de

de quantitate expeditionis Romanæ vid. Limn. *de Jure Publ. L. 4. c. 7. §. 67. & seqq.* Ea olim instituta est, ut Rex Romanorum à Pontifice coronam susciperet; quæ dicta est; die Römische Kaiserliche Krohne. Magnif. Dn. Præses *in Colleg. Jur. publ. c. 6. §. 2.* Cùm vero supervacua illa sit, & una inauguratio, in Germania facta, sufficiat, hodie cessat; & tamen Rex electus in Germania est verus Imperator Romanus. *Prælaud. Magnif. Dn. Præses d. c. 6. §. 4.* Ex hujus tamen modo definiri hodie solent collectæ ad bellum Turicum, die *Türcken-steuer/ & alia subsidia. Schütz. de Jur. publ. vol. 2. Exerc. II. tb. 5. Lit. A.*

Caput III.

Cui & in quem Jus exigendæ Adohæ competit.

Summaria.

1. Imponi Adoham ab eo, qui Jus habet servitia exigendi: & si plures ejusdem feudi domini sunt, omnibus adoham præstandam esse. 2. Si domini inter se bella gerunt, antiquiori soli eam præstandam esse; & quis sit antiquior dominus. Casus, ubi utriq; domino invicem bellum gerenti debetur. 3. De delectu, ausschusß remissivè. 4. An vasallus à suo vasallo exigere possit et si ipse nondum solverit? Aff. 5. Ab iisdem quoque adoham præstari à quibus servitia: qui quasi per indicem recensentur. 6. An remissa vasallo Adohæ, bujus quoque Vasallo ea remissa intelligatur.

C 3

§. I.

§. I.

PErpensâ jam satis Adohæ qvantitate non abs re & extra ordinem esse putamus de personis agere, inter qvas adoha præstatur. Qvod caput unicâ hac regulâ absolvitur; adoham tantùm illis & ab illis deberi, qvibus & à qvibus debentur servitia. Hæc autem inter qvos præstentur hîc qvidem non agimus, ubi de Adoha, non deservitiis tractamus. Pauca tamen qvasi per indicem delibabimus. Exigit igitur adoham, qvi servitia, scilicet dominus feudi. Si igitur plures ejusdem feudi domini sint, omnibus indistinctè solvenda est Adoha, uti omnibus servitia præstanta. 2. *feud. 77.* Nec enim dominus jure suo cadit, & vasallus ab eo ideo liberatur, qvia & alii debet servitia.

§. II.

Sed qværitur, si domini ipsi bello inter se contendant, cui potius Adoham debeat? Resp. cui servitia; sc. antiquiori soli: & si utriqve pariter assistat, feloniam in antiquiore coñittit: qvippe qvi omni juramento exceptus videtur. Matth. de Afflict. *Rubr. 30. p. 622. n. 1. de prob. feud. alien. per Lotbar.* Dominus autem antiquior æstimatur non ex tempore præsentium vasallorum, sed ratione universi feudi; ut illius feudi dominus præferendus sit, cujus primus acqvirens prior investitus est fidelitatemq; juravit, non cujus præsens possessor: ex ea enim fidelitate primi acqvarentis simpliciter & nomine excepto juratâ, dominus ejusq; ve heredes jus feudi ligii qvæsitum contra omnes habent; qvod ipsis afferri à vasallo ejusve posteris acquisitione alterius

rius feudi non potest. l. fin. ff. de Pact. l. 2. §. 16 ff ne quid
in loc. Wesenb. consil. 34. n. 31. Et, qvī præfens vasallus,
si jusjur. prior præsttit domino noviori, tenebitur
ei ad servitia contra alterum dominum, cùm anteces-
fores ipsius ad ea non tenerentur: & alias in perso-
nis heredum mutaretur substantia obligationis, con-
tra l. 2. pr. ff. de Verb. obl. qvæ sententia communius
recepta est. Hartm. Pist. l. 2. qu. 47. n. 44. & seqq. Una
tamen exceptio perpetua est, qvà utriqve domino &
scil. noviori per substitutum acceptabilem servire,
vel adoham solvere potest: cùm scil. ad alterum fra-
trem feudum pervénit, & alter adeo, non credens fa-
cile feudum ad se posterosqve suos reversurum, aliud
feudum ligium sibi qvæsivit; quo casu, contra regu-
lam communem, erit duorum vasallus ligius. 2. feud.
99. Qvæ cùm magis ad servitorum materiam per-
tineat, latius non exeqvimus.

§. III.

Neqve nunc de delectu agemus, quo Germani
principes homines ad bellum idoneos e subditis suis
eligere possunt, (vulgò der Ausschus) ut illi principem
reliqvorum sumtibus sequantur: qvod antiquissi-
mum Germaniæ institutum est, inde ab Henrico Au-
cupe usitatum, ut alibi in oppidis quinque cives sex-
tum, in pagis novem coloni decimum, vel septem o-
ctavum; alibi vigesimum, vel trigesimum instruant,
aliqvando media aut tertia pars alicujus loci seqvi pro
rei necessitate teneatur. vid. Ott. Frising. in vita Frid. I.
L. 1. c. 31. Illustr. Dn. à Seckend im Teutschen Fürsten-
Staat p. 2. c. 10. tit. 9.

§. V.

§. IV.

An autem adoham exigere vasallus à suo vasallo potest, etsi ipse eam nondum solverit domino? Aff. non enim subvasallo causa debendi est solutio vasalli, sed proprii feudi propriæq; fidelitatis obligatio; ex qua tenetur purè ad adoham præstandam: *conf. cap. seq.*

§. V.

Sic vice versa præstat adoham, qvi & servitia. vid. §. I. Hinc seqvitur (1) Feudo vendito teneri venditorem ad adoham, non emptorem, nisi ex quo domini consensu, secutâq; investiturâ, emptor factus est vasallus. Andr. de Isern c. un. § *sed nec est alia justior.* n. 36. *Qvæ sit prim. caus. ben. amit.* (2.) Idemq; esse in cæteris alienationibus, ut iis non obstantibus vasallus adoham solvat, donec consensu domini feudum ritè in alterum translatum fuerit. Qvin, si ante investitram injuncta sit Adoha, etiam post investitram, venditor eam debet, qvia semel debere cœpit, obligatioq; in personam ex impositione nata fuit. Unde &, si quis post impositionem adohæ feudum demum acquisiverit, ad eam non tenetur. Qvod utrumq; per regiam Cameram ita decisum refert Ayell. d. l. n. 61. 62. 63. Similiter inde seqvitur (3.) nec emphyteutam, qvi feudum in emphyteufin consensu domini à vasallo accepit, teneri ad Adoham, cum non ipse, sed vasallus fidelitatem & ex ea servitia debeat. Multò minus (4) Creditor, qvi feudum jure pignoris tenet; aut (5) Fructuarius; aut (6.) Vidua, cui dotalitium in feudo constitutum est; nedum (7.) Colonus &c. Ayell. a.l. n. 56. Eadem ratione nec (8.) Apanagiatus

tus adoham præstat; cùm non ipse sed primogeni-
tus in feudo, ejusqve oneribus succedat. Henr. à
Springsfeld. *de Apanag. c. II. n. 193. & seqq.* Et licet apa-
nagium in feudo constitutum fuerit, non tamen ideo
apanagiatus hanc adoham domino, sed aliam ipsi pri-
mogenito ratione hujus subfeudi, ut vocant, debet.
Qvod (9.) idem est in Vasalli vasallo, qvi adoham qvi-
dem ex sua investitura debet vasallo, sed aliam, & ab
ista, qvam ipse vasallus domino præstat, qvantitate,
modo, ac præstandi temporibus diversam: qvippe
de qva ex solius vasalli, seu posterioris domini necessita-
tibus statuitur. Ayell. *d. l. n. 67.*

§. VI.

An autem, si dominus vasallo Adoham remiserit,
hic etiamnum à suis vasallis eam exigere potest? Aff.
Qvia duo distincta debita, diversæq; causæ sunt; qvarū
unâ proinde remissâ, altera non tollitur *l. 7. pr. ff. de Cond.*
furt. l. 1. §. 5. ff. de Verb. obl. l. 20. pr. ff. de Servit. rust. cùm
inprimis remissiones strictissimi juris sint, *l. 29. eod. l. 25.*
pr. ff. de Probat. **Q**vin videtur vasallus solvisse, dum pa-
rato solvere dominus remittit, & qvasi reddit. **E**t
alias non ipsi primo vasallo, cui dominus voluit, sed ejus
vasallis Adoha remissa foret, contra mentem domini,
qvi in solum vasallum liberalitatem conferre voluit.
Dissentit Matth. de Afflict. *l. 3. rubr. 2. §. sed nec est alia n.*
30. & 31. qva sit prim. caus. ben. am. Secus ergò, si remis-
sa sit intuitu etiam subvasallorum. Ayell. *d. l. n. 60.*

Caput IV.

De Cætero jure Adohæ.

D

sum-

Summaria.

1. Quando Adoba debeatur? & quodnam sit justum bellum. 2. Quando non solutâ Adobâ feudo privetur vasallus. 3. Cujus electio fit inter servitia, Adobam & substitutum, Vasalli an domini? 4. Cujus periculum e quo amissô, & feudo inter rim in alium translato? 5. Quando cesseret Adoba?

§. I.

QVæ reliqua qvoq; sunt Adohæ Jura, servitorum, qvorum sunt æstimatio, rationem seqvuntur. Cùm igitur toties servitia debentur, qvoties opus est, ad tuendum dominum, ejusq; ve jura & honorem, 2. F. 5. 6. 7. in eosdem casus Adoha debetur, cùm in locum servitorum jure succedunt. *Conf. tb.* Neq; tantùm tuendo domino, sed & offendendis hostibus domini auxilium debet Vasallus in bello justo 2. F. 7. vers. et si contigerit. Justum autem bellum sit, nec ne, judicium est solius Principis, non vasallorū. Magnif. Dn. Præses in *Lection. colleg.* Grot. ad 1. 2. c. 26. §. 8. Si autem notoriè injustum est, adeoq; ve latrociniū potiùs, nec Vasallus tenetur, 2. F. 28. nec ipsi milites mercenarii, aut subditi, qui tamen naturali vinculo ad defensionem Principis sui operis & opibus obligati sunt. *præland.* Magnit. Dn. Præses in *Praelect.* Grot. ad d. 1. 2. c. 26. §. 3.

§. II.

Effectus est, qvòd Adohâ non solutâ, si nec Servitia debitè præstita sint, Vasallus Feudo privetur, 2. F. 54. & 55. § firmiter 1. F. 21. modò rite interpellatus sit. 2. F. 26. §. licet & 2. F. 28. vers. ad bac. Et sufficit unica, saltem

saltem interpellatio, sive illa generalis sit, qvà omnes simul vasalli literis publicis, vulgò patentibus, evocantur, sive specialis. 2. F. 7. Si tamen aliunde Vasallus rescriverit, domino magnum periculum imminere, ultro & sponte suâ ei adjutorium præbere debet. 2. F. 26. d. §. licet. Si verò eam fraudet aut diminutè solvat, in quadruplum eum alibi teneri referunt Ayell. d. l. n. 52. in fin. Jacob. de Franch. in Prælud. Feud. c. 2. n. 198.

§. III.

Cùm igitur vasallus feudum amittere dicatur, si vel ipse vocatus servitia non præstiterit, vel substitutum acceptabilem non miserit, vel adoham non solverit, anceps qvæstio magnaqve contentio inter Dd. est, cuius sit electio, domini an vasalli? Alii statuunt, domini esse electionem, cui invito aliud pro alio solvi non queat 1. 2. §. 1. ff. si cert. pet. Communis autem sententia vasallo electionem tribuit; Jacob. de S. Georg. de Feud. vers. Et promiserunt eidem n. 26. pag. 218. Pet. Nic. Mozz. de Feud. tit. Ex qvib. caus. Feud. am. n. 109. Jul. Clar. l. 4. §. feudum q. 22. Springsfeld. de Apanag. c. 11. n. 223. Sed nec hæc sententia satis accurata, nec in genere admittenda videtur. Pro decisione igitur dicimus 1. Non rectè statui obligationem vasalli alternam, qvæsi alternativè in obligatione sit, ut vel servitia præstet, vel substitutum mittat, vel adoham solvat; cùm unum tantùm sit in obligatione, scil. sola servitia, qvippe qvæ sola promittit vasallus. 2. F. 7. Et 23. in fin. Constat autem in obligatione, qvæ ex conventione esse, tantùm id esse de quo conventum est. arg. l. 6. §. 1. ff. de Re jud. l. 2. C. de Resc. vend. Adoha igitur non est in obligatione, sed summùm in solutione,

D 2

qvæ

qvæ è lege est. arg. l. 6. §. 1. ff. de Rejud. l. 2. C. de Resc. vend. qvam differentiam latius exposuit Magnificus Dn. Præses in Disp. Trajecti habita de Elect. rei conventi ex enor- mi læs. sect. 1. tb. 8. & 9. Hinc dicimus 2. electionem, planè vasalli esse, eumqve posse adoham solvendo à servitio se liberare; qvod enim ex lege, seu in solutione est, id totum est in arbitrio debitoris, eiqve le- ge tributum, ut is ejus solutione liberare se possit. per text. expr. in d. l. 6. §. 1. d. l. 2. vid. d. Disp. sect. 2. per tot. Non tamen dimidium unius anni redditum dicimus simpliciter in solutione esse, sed integra militiæ stipendia, qvorum saltem subsidiaria æstimatio est semis iste reddituum; si fortè dominus majora stipendia probare non possit, vel onus probandi suscipere nolit. vid. sup. c. 2. §. Perinde ut usuræ qvincunes vel semisses ex mora, qvæ quantitas lege definita est in subsidium, si creditor plus suâ interesse, & qvasi majus moræ pre- cium, probare nequeat, vel id onus defugiat conten- tus usuris legalibus. per l. 2. §. ult. in fin. ff. de Eo qvod cert. loc. R. I. 1600. §. So viel nun 154. Ita constat, in obligationibus faciendi, qvalis est hæc vasalli, reum, non liberari, nisi præstando omne id qvod interest. l. 72. pr. l. 112. pr. ff. de Verb. obl. l. 13. in fin. ff. de Re jud. Qvin integra militiæ stipendia deberi exerte dicitur in 2. F. 54. vid. d. c. 2. Nec movet, qvod in R. I. 1529. §. 16. dicitur; consensu Statuum Imperii ex singulari causa ab Imp. constitutum esse, ut portio expeditio- nis Romanæ pecuniâ qvidem solvatur. Ex eo enim patet, Cæfaris electionem non esse, sed reqviri consen- sum Statuum; at hic de electione vasallorum agimus. Eqvidem qvorundam servitiorum ea est natura, ut redimi

redimi precio non possint, uti officia exeqvias ducendi &c. Dicimus 3. è contrario, domini esse electio-
nem hactenus, ut non teneatur qvemvis substitutum
admittere, sed sibi acceptabilem; aliàs enim pluri-
mùm interest: Vasallus, qvi servitia debet, beneficio
perpetuo est obstrictus, jurej. illigatus, ac è familia
ortus, qvam dominus idoneam militiæ credidit: non
igitur satisfit obligationi feudali, si ejus loco qvilibet
extraneus mittatur. Atqve hinc semper reqviritur,
ut substitutus sit domino acceptabilis; 2. F. 55. §. 1. verb.
vel alium pro se domino acceptabilem mittere &c. 2. F. 99.
in fin.

§. IV.

Cæterùm eqvus, qvem vasallus cum substituto mi-
sit, perit vasallo, ceu domino, *t. 9. C. de Pign. act.* nec enim
casus bellicos Principes vel domini præstant: ut & sen-
tiunt Rosenth. *de Feud. c. 8. concl. 22.* Coler. *Decis. 81.*
etsi aliud Jure Saxonico obtineat. Lehnr. *c. 4. §. fin.* Co-
ler. *d. l.* Sed valdè ambiguum videtur, si feendum in ali-
um Vasallum interim translatum, & v. gr. alii venditum
fit, cui eqvus redeat vel pereat? Resp. Priori Vasal-
lo seu venditori, qvi misit; is enim ejus dominus est &
manet, &, cùm tempus impositionis inspiciatur, poste-
rior nec servitia, nec adoham debet, qvæ antè im-
posta sunt; per tradita *c. 3. tb.* Igitur Venditoris nomi-
ne substitutus militat, eiqve eqvus vel reddit, vel perit;
& ab eo reparatur, si defecit, servitium: Atqve ita
respondit superiore anno Ampl. Fac. Jur. hujus Uni-
versitatis. At si iterum, factâ jam translatione feudi,
Vasalli citentur ad servitia, vel nova exigatur Adoha,
emotor

emptor ea præstat; atqve adeò venditor ab omni onere sumtuqve in bellum liberatus est.

§. V.

Denique cessat Adoha, qvoties servitia non debentur: uti in Feudo franco, & plurimis aliis modis: qvi tractatus cùm ad servitiorum materiam pertineat longèqve prolixior instituto nostro sit; neqve hic de servitiis, ut supra testati sumus, sed de Adoha, & qvæ ei propria sunt, agere propositum sit, de eo nihil nunc addimus.

COROLLARIA.

I.

IN Stalu primævo nulla fuit Successio; sed ea meritò surrogata est Jure Gentium in locum juris occupandi res nullius: Collateralium & ascendentium successio est juris positivi.

II.

Hoc Jus acquiritur liberis in ipso momento nativitatis, quamuis facultas illud exercendi suspenderatur in tempus mortis parentum.

III.

Primogenitus præfertur fratribus, et si extra regiam dignitatem natus, aut per subsequens matrimonium legitimatus sit.

IV.

COROLLARIA.

IV.

Potest summa potestas hoste prævento locum pacatum occupare, nec finito bello regulariter restituere tenetur.

V.

Rex Romanorum neque mortuo Imperatore, neque eo absente, nisi hic vices suas ei specialiter commiserit, est Vicarius Imperii.

VI.

Electores ecclesiastici, et si nondum inaugurati; & seculares, licet nondum investiti, ad Electionem Regis Romani vocari debent.



64 TK 3118

0000

0000

0000

V

IV

E

W

M



